

**Kekalkan sikap berdaya saing
Utusan Online
05 Mac, 2012
Oleh RAJA SYAHRIR ABU BAKAR**

KUALA LUMPUR 4 Mac - Datuk Seri Najib Tun Razak berkata, kerajaan akan terus memperkasakan konsep jaringan keselamatan sosial rakyat di negara ini agar setiap lapisan masyarakat kekal berdaya saing.

Perdana Menteri menegaskan, usaha itu termasuk mendengar keluhan setiap lapisan masyarakat untuk dipertimbangkan, seterusnya menyediakan pelbagai bentuk peluang dan skim bagi memastikan kesejahteraan mereka.

Kata beliau, ia amat berbeza dengan konsep *welfare state* yang banyak diamalkan di negara maju sehingga menyaksikan negara berkenaan mengalami ketidaktentuan serta kemelesetan ekonomi.

"Apabila mereka mengamalkan konsep *welfare state*, ia lebih kepada kerajaan memberi segala-gala yang dituntut oleh rakyat dan mereka tidak berusaha.

"Seperti contoh, mereka menuntut waktu bekerja dipendekkan kepada 35 jam seminggu berbanding 48 jam dan kalau mereka tidak ada pekerjaan, mereka boleh mengharapkan bantuan kerajaan dan kelebihan yang ada pada negara itu dari segi daya saing, etika kerja dan kekuatan dalaman semakin hari semakin tumpul," katanya.

Beliau berkata demikian ketika berucap pada program Kebajikan Rakyat 1Malaysia (Karisma) pertubuhan bukan kerajaan (NGO) bersama Perdana Menteri anjuran Kementerian Pembangunan Wanita, Keluarga dan Masyarakat (KPWKM) di Stadium Putra Bukit Jalil, di sini hari ini.

Pada majlis itu, Perdana Menteri turut melancarkan Sekretariat Gedung NGO@KPWKM di bawah kelolaan Institut Sosial Malaysia (ISM) bagi menyelaraskan pelbagai suara dan tuntutan kira-kira 4,000 NGO di seluruh negara.

Dalam pada itu, kata Najib, kerajaan akan terus mendampingi pelbagai NGO sebagai rakan kongsi strategik dalam usaha pembangunan masyarakat.

Katanya, peranan NGO sebagai satu kuasa baru adalah semakin penting ekoran fenomena ledakan maklumat dalam era globalisasi yang disaksikan di seluruh dunia kini.

"NGO mewakili kumpulan masing-masing sama ada untuk memperjuangkan soal hak wanita, orang kurang upaya (OKU) dan perlindungan kanak-kanak atau apa sahaja, maka mereka ini merupakan sebahagian daripada masyarakat kita yang bertambah penting berbanding masa lalu," katanya.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0305&pub=Utusan_Malaysia&sec=Dalam_Negeri&pg=dn_01.htm